



Skina di Ruthy


Bon dia yen di alegria!

Skirbi pa Ruthy "Lady Ruth" Vrieswijk-Bergen

Ora tin varios tema di actividadnan cu a tuma lugar y nos tin hopi cos bunita di skirbi di nan, pero nos no por corda tur detayes, hahahahah! Pero.....potretnan bunita por papia pa nan mes e ora ey, no ta asina? Nos relato di e siman aki ta dedica na nos dia nacional. Despues nos lo toka e otro bunita actividadnan cu a tuma lugar recientemente. Pa nos, nos celebracion di nos dia di hymno y bandera a cuminsa diabierna anochi, ora cu a inaugura e bunita Plaza Padu den centro di Oranjestad, meymey di invitadonan y un publico hopi grandi. Tur cu a bin duna homenahe na nos tata di cultura Juan Chabaya "Padu" Lampe, cu tin e bendicion di por mira na bida un bunita Plaza dedica na dje na su nomber: "Plaza Padu". Un anochi di fiesta cultural cu dushi canto, musica y baile. E orkesta a toca bunita, Landa, Edwin y Victor Samuel a canta bunita y a trece hopi dushi ambiente riba Plaza Padu. Ki bunita palabranan di bendicion di Pastor Jairo prome cu e famianan di e tres baluartenan Padu, Hubert y Rufo a inaugura e Plaza, kitando e tela firme cu tabata tapa e estatuanan di e tresnan aki, dos di nan sinta na Piano y un di nan para. Ta pa su mayan mainta Lady Ruth durante su keiromento riba dia nacional, a wak kennan tabata sinta ta toca piano y ken ta para ta dirigi. Ah si! Lidwina, un di e yiu muhenan di Lio tambe a canta masha bunita mes, tocando su guitarra. Despues mas laat e invitadonan y publico presente por a goza di e musico pianista internacional Raul di Blassio, kende a duna un tremendo show cu su tokenan gracioso tambe. Hasta bendicion di un crenchi awa cu a fingi fingi e Plaza bunita aki a haya caba e diabierna anochi ey. Bendiciona hasta e fontein bunita cu tin su adornanan di e teclanan di piano. Padu, nos dushi Padu tabata central y den centro di tur atencion cu despues hopi hende a bin saca potret di nan hunto cu Padu. Ma mi'n bisa'bo cu mi no por corda tur detayes tur ora ora tin mas di un actividad bunita den e mesun siman? Mi a lubida di menciona e prinses di Padu, Vivian, kende tambe a toca piano bunita e anochi ey, hunto cu e orkesta. Vivian a mustra asina elegante cu su bunita peinado y make up!



Diasabra dia 18 di maart mes, mi casa y ami a busca nos mayornan pa dal un keiro riba isla cu nan pa wak e banderanan ta bula den biento, con nan ta baila. Nos a bay pa cumpra sopi na Cas di Cultura, pero ainda no ta tur e sopinan a worde tresi, pues, nos a sigui keiro y a bay cumpra algo di come na un otro caminda. Mas atardi mi casa cu mi a sigui keiro un tiki toch, en busca di sanger yena pa nos grandinan, pero esnan cu nos a logra cumpra riba plaza den curason di sta. Cruz tabata garna so, nan no tabata bon teni hunto. Pero, nos a goza si di e snacknan di Dabaru di The Kelkboom kitchen, kendenan tambe tabata presente na sta. Cruz. Dushi pa topa cu nos dushi hendenan riba e bunita plaza ey y combersa un crenchi. Nos a yega cas tur cansa y soda di nos dushi solo radiante cu nos curason contento y yen di gradicimento pa un otro bunita celebracion di nos dia Nacional. Asina cansa cu nos a pega sonjo lubida di wak e bunita concierto di Edjean Semeleer cu su grupo di artistanan den Ser'i Noka. Pero.....nos a goza di wak tur e bunita impresionnan di potret ariba face book !!! Pabien Edjean !!! You did it !!!!



Slaap uit mainta, lubida di wak e parada di gruponan uniforma na televishon !! Ufffff, esey ta pasa ora edad ta subi lentamente suavemente, hahahahah. Pero....."all in all" nos a goza hopi di nos dia nacional, dia 18 di Maart 2017. Danki pueblo pa boso bunita comportacion!

